

DALISANDVS eidem Notitiæ. *Stephani* Dalisandi Præfulis mentio fit in eadem epistola Synodica.

CLAVDIOPOLIS Constantino Porphyrogennetæ in Themate Seleuciæ. *Montanus* huius Episcopus adfuit Concilio Constantinopolitano primo.

GERMANICOPOLIS eidem Constantino ibid. *Terannus* eius Episcopus in eodem Concilio legitur.

SBIDE dictæ Notitiæ antiquæ, Bida libro Conc. *Conon* Bidæ Antistes act. 6. Conc. Chalced. dicitur, qui in alijs editionibus Isidis Episc. nominatur.

CESTRVS Notitiæ antiquæ Græcæ, Caystrus Ptol. lib. 5. cap. 8. *Epiphanius* eius Episcopus subscripsit dictæ epistolæ Synodicæ Isauriæ.

OLBVS Straboni lib. 14. Olbasa Ptolem. lib. 5. cap. 8. vulgò *Albistauerati* Molano. *Paulus* Olbi Episcopus in eadem epistola dicitur.

LYBIAS vrbs Episcopalis Isauriæ est in dicta epistola Synodica, cui *Conon* huius Antistes subscripsit.

HERMOPOLIS vrbs Episcopalis eiusdem prouinciæ in eadem epistola, in qua *Iulianus* eius Episcopus nominatur.

IRENOPOLIS dictæ Not. antiq. ab Irenopoli quæ in Cilicia est, diuersa. *Menodaurus* Irenopolis Antistes ex Isauria, in actione 6. Cōc. Chalc. legitur.

SEBASTE vrbs Episcopalis Isauriæ est in dicta epistola, cui *Sebastianus* Sebastenus Episcopus subscripsit. Sed mendosè syngrapham illam superadditam esse ex hoc conijcimus, quod ciuitas illa ex Cilicia sub Tarso sit, vt iam Notitijs antiquis, & Ptolemæo annotauimus.

EVPHRATENSIS.

HIERAPOLI Sin Cyrrestica regione Ptolem. lib. 5. cap. 15. vulgò *Haleppo* Bellonio. Sed contra mentem Zonaræ & Cedreni, qui hoc nomen Berroæ tribuunt. *Stephanus* Metropolis Hierapolis Episcopus subscripsit Concilio Chalcedonensi.

CYRRHVS Ptol. ibid. hodie *Quars* vel *Carin* dicitur. *Theodoretus* eius Episcopus est in eodem Concilio, & *Isidori* Cyrri Antistitis memoria est apud Theodor. lib. 5. cap. 4.

SAMOSATA Ptolem. ibid. vulgò *Scemsat*. *Antiochus* huius Episcopus subscripsit Concilio Constantinop. 1. & *Andrea* Samosatani Præfulis mentio fit apud Theod. hist. lib. 2.

DOLICHE Ptolem. ibid. nomen antiquum retinet. *Maris* eius Antistes in Concilio Constantinopolitano primo legitur.

GERMANICIA Ptol. ibid. vulgò *Adata* teste Manass. *Salomonis* huius Præfulis memoria est in Concilio Nicæno.

ZEVGMA Ptol. ibid. *Bassus* huius Episc. subscripsit Conc. Antiocheno.

PERRE Anton. in Itiner. *Sabinianus* Episc. Perriæ adfuit Conc. Chalc.

EVROPVS Ptol. ibid. quæ & Amphipolis & Thapsacum teste Plinio. *David* huius Episcopus subscripsit Concilio Chalcedonensi.

VRIMA Ptolem. ibid. Orimi dictæ Notitiæ antiquæ. *Mara* Orimorum Episcopus dicitur in Concilio Chalcedonensi.

CÆSAREA dictæ Notitiæ antiquæ, Neocæsarea libro Concil. vrbs Episcopalis in Euphrateni. *Paulus* Neocæsariensis ex Syria Coële Euphrateni vicina Concilio Nicæno subscripsit.